

**Pemilihan Umno jangan jadi seperti DAP, kata Naib Ketua Pemuda  
Malaysian Insider  
Aug 22 , 2013  
OLEH MD IZWAN**

Naib Ketua Pemuda Umno, Datuk Razali Ibrahim (gambar) menasihati pemilihan parti itu yang bakal diadakan tidak lama lagi berjalan dengan lancar dan telus supaya tidak menjadi seperti DAP.

Razali berkata, sistem pemilihan baru yang lebih terbuka bukan alasan untuk calon bertanding melakukan sesuatu melampaui batas.

"Semua perwakilan terbuka untuk bertanding, tapi janganlah kita membuat perkara yang salah sehingga berlaku seperti DAP dalam pemilihan mereka.

"Umno janganlah macam itu pula, nanti orang lupa pasal DAP kemudian orang bercakap pasal Umno pula," kata Razali yang ditemui di Putrajaya hari ini.

Razali berharap calon dan pihak bertanggungjawab yang mengendalikan proses pemilihan dapat memastikannya berjalan dengan baik.

"Jadi sebagai orang yang hendak bertanding dan mengendalikannya perlu menjaga perkara itu," katanya.

Bagaimanapun, Timbalan Menteri Di Jabatan Perdana Menteri itu menegaskan calon yang bertanding harus mempunyai kelayakan dan mampu memikul amanah.

Razali terlebih dahulu hadir di Mahkamah Rayuan bagi memberikan sokongan terhadap bantahan kes rayuan Gereja Katolik bagi mengenyepikan rayuan kerajaan berhubung penggunaan kalimah Allah dalam kitab Injil berbahasa Melayu.

Jabatan Pendaftaran Pertubuhan Malaysia (RoS) mengarahkan DAP mengadakan pemilihan semula Jawatankuasa Eksekutif Pusat (CEC) ekoran isu penyelewengan undi pada pemilihan CEC dan isu manipulasi undi membabitkan 547 perwakilan.

Pemilihan Umno yang akan diadakan secara serentak pada 19 Oktober depan untuk memilih pemimpin di peringkat bahagian dan pusat bukan saja penting untuk kelangsungannya menghadapi pilihan raya akan datang, bahkan juga merupakan ujian kepada ahli peringkat akar umbi yang pertama kali diberi peluang memilih pemimpin serta mencorakkan parti itu.

Jika dahulu hanya kira-kira 2,500 perwakilan terpilih yang akan menentukan pemimpin di peringkat atasan tetapi kini peluang itu sudah diperluaskan kepada kira-kira 150,000 perwakilan daripada lebih 20,000 cawangan Umno di seluruh negara.- 22 Ogos, 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/pemilihan-umno-jangan-jadi-seperti-da-p-kata-naib-ketua-pemuda>

